




*Senin, 21 September 2020*

**Ogen: Yakob 1:12-18**



**UJIN DINGEN PERCUBAN**



**A**di kalak sekolah wajarna kin ikut i bas ujian, tapi i bas geluh enda kita erlajar dingen ngikuti ujian si la si eteh katawari dung janah kita arus sikap ngalakenca katawari paksa pe. Enda me si ikataken Jakob maka lalap lit ujin dingen percuban i bas geluh enda.

Percuban enda nina Jakob bas ay. 13 ula min ikatakenndu rehna i bas Dibata nari, sabap Dibata labo banci icubai si jahat, janah ise pe labo icubai Dibata. Jadi kai dage percuban e? Sada kejadi/peristiwa si engkenai geluhta si banci erbahansa kita ndabuh ku bas dosa je nari sirang ras Dibata. Percuban e labo rehna bas Dibata nari, ras biasana percuban e ngerugiken kita. Pemena tempa meriah si akap, untung tempa tapi kedungenna jadi kiniseran si mesangat. Pengujin e rehna bas Dibata nari, atena ngenehen terjeng i ja bagesna ras paguhna kinitekenta. Amin pe si tuhuna itandaina nge kita seh ku bas pusuh si mbagesna. Saja iuji kita gelah ipastikenna man doni enda kita tetap setia. Emaka gejakkenlah e sada kesangapen, kemalemen ate nina Jakob, bagin dalam kemenagen si arus si bentasi.

Lit ka pe percuban si reh labo erkiteken iijinken Dibata, tapi erkiteken kita tergoda jenari kena siding sura-sura jahat, emaka tubuh me dosa janah buahna eme kematen. Emaka nina Jakob ula kita tertipu, adi kin si reh man banta pemere i bas Dibata nari, kerina e pasti maba kiniulin man geluhta, sabap Dibata la pernah nadingken kita, tapi adi reh i bas sura-sura si jahat nari, tentu geluhta idemi kiniseran rasa lalap.

Uga kita gundari ngalaken kiniseran i bas geluhta, lit nge i bas kita biak megenggeng, sabar, ntah rusuren sisalahken Tuhan i bas kerina kai si jadi man banta? Mari pebelin biak megenggeng dingen saber gelah kita ngasup dingen menang naluken percuban.